

TEZAU LITURGIC

8 MAI

ACATISTUL SF. CUVIOS ARSENIE CEL MARE



MOSCOVA, 2000



Акафист

святому преподобному

Арсению Великому

Кондак 1

Избранный угодниче Божий, пресветлый
путыни светильниче, и богомудрый монахов
наставниче, преподобне отче наш Арсение! Со
ангелы предстояй триипостасному Богу, и
стяжавый к нему дерзновение многое, молися
выну о спасении нас грешных, и молитвами
твоими от всяких бед свободдай зовущих ти:

Радуйся, Арсение великий пустынножителю.

Икос 1

Ангела во плоти и человека небеснаго ве мы
тя, преподобне отче Арсение. Ты бо чистотою и
святостию жития твоего, безплотным силам
поревновал еси, и земнородных удивил еси,
являя всем дивный образ в себе совершенства
духовнаго. Темже восхваляем тя и глаголем:

Радуйся, ветхаго рима святое прозябение:

радуйся, родителей благочестивых
пречестная отрасль.

Радуйся, от младости на подвиги духовныя
предъизбранный:

радуйся, от юности единого Бога всем
сердцем возлюбивый.

Радуйся, премудрости земной добре
обученный:

радуйся, премудростию небесною одаренный.

Радуйся, закон Христов на скрижаляхъ
сердца твоего начертавый:

радуйся, во всех оправданиях господних
непорочно ходивый.

Радуйся страхом Божиим огражденный:

радуйся, ритор и богослов изрядный бывый.

Радуйся целомудрие души и тела невредимо
сохранивый:

радуйся, свято и богоугодно на земли
поживый.

Радуйся Арсение великий пустынножителю.

Кондак 2

Видев сердцеводец Господь, непорочную чистоту души твоея, отче Арсение, во диакона святыя римския церкви ты постави, да служиши пречистым и животворящим Христовым тайнам, и, яко достойный сосуд Божией благодати, возносиши молитвы соборныя за вся люди, воспевая пресвятей троице: Аллилуия.

Икос 2

Разума Божественнаго преисполнен был еси, Арсение богомудре, яко не быти равному тебе в премудрости и благочестии во всем царствии римстем. Темже царь Феодосий в наставника сыновом своим Аркадию и Онорию ты избра, сим подвизая и нас звати тебе:

Радуйся, от запада к востоку пришедый светити людям богомудрием твоим:

радуйся, от ветхаго Рима в новый Рим преселившийся на новыя подвиги духовныя.

Радуйся, царей наставниче и учителю:

радуйся владык земных к царствию горнему руководителю.

Радуйся, при дворе царstem подвижничеству
о Христе прилежавый:

радуйся дни на учение, нощи же на молитву
посвящавый.

Радуйся, от царя Феодосия зело любим и
почитаем бывый:

радуйся отцем царя и сыновей его
нареченный.

Радуйся, саном сенаторским почтенный:

радуйся во славе царствия земнаго смирения
святаго преисполненный.

Радуйся, молитвы усердныя к Богу
возсылавый:

радуйся, коленопреклонения многия
совершавый.

Радуйся, Арсение, великий пустынножителю.

Кондак 3

Силою Божиею укреплен, отче преподобне,
возжелал еси в безмолвии пустыннем работати
Господеви, вину же восприем гнев на тя
царевича Аркадия, умыслил еси тайно оставить
двор царский, и скрытися в пустыни, да

невозбранно возможещи воспевати Богу
серафимскую песнь: Аллилуия.

Икос 3

Имея желание велие спасти душу твою, отче
Арсение, молился еси Богу, да укажет тебе путь
правый ко спасению, и услышал еси глас
небесный, глаголющ тебе: "Арсение, бегай от
человеков, и спасешия!" Темже от двора
царского тайно изшел еси, в худыя ризы
облеченный, и в пустыню скитскую пришел еси,
прося отцев пустынных, да сотворят тя иноком.
О сем ты славяще зовем:

Радуйся, от Самого Господа тайно наученный
подвижничеству духовному:

радуйся, гласом небесным наставленный
безмолвствовать душеспасительно.

Радуйся, дом царский оставивый, да
царствие горнее унаследиши:

радуйся, всю славу мира сего презревший, да
славу вечную небесную получиши.

Радуйся, един единому Христу в пустыни
работати возжелавый:

радуйся, святой ангельский образ усердно
себе просивый.

Радуйся, от великаго Иоанна Колова во смирении дивно искушенный:

радуйся, смирение нелицемерное во искушении том показавый.

Радуйся, пострижение во иночество от рук его святых восприявый:

радуйся, от него предъуведенный, яко инок благоискусен будеши.

Радуйся, в безмолвии пустынном добре подвизавыйся:

радуйся, в посте и молитвах неослабно пребывавый.

Радуйся, Арсение, великий пустынножителю.

Кондак 4

Бури страстей избежав, отче Арсение, в пристань благодатнаго безстрастия достигл еси, и в пустыне скитстей равноангельно пожил еси, Богом наставляемъ к безмолвию совершенному, дивным житием твоим удивлял еси вся отцы пустынные, и подвизал еси их славить Бога и пети ему: Аллилуия.

Икос 4

Слышав паки глас небесный: «Арсение, бежи от человек и в молчании буди: ибо сие есть корень безгрешия», - в пустыню глубочайшую удалился еси, преподобне, и молчанием уста твоя заключил еси, избегая бесед человеческих, да выну беседуеши с Богом в сердце твоём. Сего ради и мы вопием к тебе:

Радуйся, высоте безмолвия, удобовосходящая точно избранными из избранных:

радуйся, глубино смирения, удостоенная благоволения Божия.

Радуйся, прозорливче дивный, древним пророком уподобивыйся:

радуйся, дара предведения преисполненный.

Радуйся, бегавый от людей, да не разлучиши с Богом:

радуйся, молчавый устами, да не престанеши вопия ко Господу в сердце твоём.

Радуйся, истинный Христов угодниче, вся заповеди Его верно совершивый:

радуйся, о Христе вся ближняя твоя искренно любивый.

Радуйся, правило иноческаго безмолвнаго жития:

радуйся образу совершенства духовнаго.

Радуйся, о нем же удивишася ангели:

радуйся, о нем же Бога славят человецы.

Радуйся, Арсение, великий пустынножителю.

Кондак 5

Богоприятный источник слез молитвенных, очи твои источаху, преподобне отче, и толико умиления божественнаго преисполнен был еси, яко плакати тебе выну при молитвах твоих. Темже и нас поучаеши примером твоим со слезами молиться Богу, и пети Ему во умилении сердечнем: Аллилуия.

Икос 5

Виден был еси весь огнезрачен, на молитве предстоя, серафимскою любовью ко Господу объятый, и богомыслием высоким от земли к небесным возносимый, отче Арсение. Дивящися убо сему начатку славы твоея, ублажаем тя благохвалении сими:

Радуйся, пустыни скитския духовное украшение:

радуйся, Египта славо и похвало.

Радуйся, державо безмолвия:

радуйся, мира Христова обитель.

Радуйся, слез источниче неоскудный:

радуйся, молитв благоухающее кадило.

Радуйся, псалмопения органе прекрасный:

радуйся, терпения столпе непоколебимый.

Радуйся, праздность душевредную
возненавидевый:

радуйся, руками твоима кошницы
сплетавый.

Радуйся, молитвою непрестанною с Богом
выну беседовавый:

радуйся, видения небесныя тайно
созерцавый.

Радуйся, Арсение, великий пустынножителю.

Кондак 6

Проповедник был еси душеспасительный,
отче Арсение, всем к тебе приходившим,
молчанием твоим поучавый паче риторского
благословения вся верныя, видевшыя в тебе
совершенного о Христе подвижника, сильного

пред Богом и людьми, егоже лице, яко лице ангела Божия, светом небесным сияше. Темже и вопияху прославльшему тя Богу: Аллилуия.

Икос 6

Возсияв великими добродетельми твоими в пустыни скитстей, яко солнце пресветлое, отче Арсение, весь мир озарил еси славою твоих подвигов, и твоего безмолвнаго жития, иже во образ всем безмолвником от Бога дадеся, и в правило известное ко спасению. Темже присно ты славяще вопием:

Радуйся, заповедей Христовых верный исполнителю:

радуйся примером твоим богомудрию совершенному люди научивый.

Радуйся, ангельское житие на земли показавый:

радуйся, святую Христову церковь подвигами твоими благоукрасивый.

Радуйся, возшедый на верх добродетелей христианских:

радуйся, нисшедый во глубину смирения святаго.

Радуйся, добрый делателю винограда
небесного:

радуйся сладкия плоды Христу принесый.

Радуйся, разсуждение духовное стяжавый:

радуйся, богомыслие молитвенное
возлюбивый.

Радуйся пустыннолюбивая горлице, предтече
подобящаяся:

радуйся, сосуде Господень, Дарами Святаго
Духа преисполненный.

Радуйся, Арсение, великий пустынножителю.

Кондак 7

Хотя Господь явити отцем пустынным твоего,
отче Арсение, безмолвнаго жития совершенство,
показа единому от них в видении, како корабль
твой в велицем безмолвии не человеки и не
ангелы, а Самим Господом управляется: и тако
всем ведомо сотворися, яко бегая от человеков с
Богом соединился еси, зовый Ему: Аллилуия.

Икос 7

Ново и дивно бысть житие твое, преподобне
отче, в молчании и безмолвии крайнем
проводимое тобою в пустыни скитстей: дивны

бяху и бдения твоя всенощныя, в нихже, воздев
горе руке твоей на заходе солнца, стоял еси тако
моляся, дондеже солнце восхождаше. О сем
удивляющемся, вопием ти сице:

Радуйся, преподобне, пустыню бесплодную
духовно оплодотворивый:

радуйся, богоносе, от Египта добродетельми
твоими всему миру возсиявый.

Радуйся, отче, отцев красото:

радуйся, пустынножителей богомудрая
доброто.

Радуйся, нищеты рачителю:

радуйся, ангелов собеседниче.

Радуйся, видений божественных
тайнозрителю:

радуйся яко тебе безвестная и тайная Бог
явил есть.

Радуйся, яко тобою мнози ко спасению
наставлени быша:

радуйся, яко тобою заблуждающийся путь
правый обретоша.

Радуйся светилниче, сияющий богомудрия
лучами:

радуйся, реко многоводная учения
божественного.

Радуйся, Арсение, великий пустынножителю.

Кондак 8

Странническое на земли житие возлюбил еси,
отче Арсение, не имый zde пребывающаго града,
но грядущаго, Иерусалима небеснаго, выну
взыскуяй, преходил еси от места на место в
пустыни скита египетскаго, и тако, яко
бесплотный, нищетно и безмолвно пребывал еси,
взывая ко Господу: Аллилуия.

Икос 8

Весь ум свой в Бозе углублен имел еси,
Арсение отче наш, и толико богомыслию
непрестанному прилежал еси, яко многажды
забывати тебе о пищи и питии. Научи убо и нас
ленивых и нерадивых бодрствовать в молитвах
к Богу, да тебе благодарственно зовем:

Радуйся, освященный сосуде Божия
благодати:

радуйся, сокровище пребогатое добродетелей.

Радуйся, яко час смертный присно поминал
еси:

радуйся, яко дне суднаго в забвении не положил еси.

Радуйся, яко рыдал еси горце вспоминая мучения вечная:

радуйся, яко плакал еси во вся дни живота твоего, да избегнеши геенскаго пламене.

Радуйся, смирением совершенным низложивый вся искушения прегордаго велиара:

радуйся, неуязвим пребывавый его разжженными стрелами.

Радуйся, руце твои преподобныя со дерзновением горе воздевавый:

радуйся от захода до восхода солнечнаго в молитвах Господеви предстоявый.

Радуйся, преисполненный божественныя любви:

радуйся, болий в лице преподобных.

Радуйся, Арсение, великий пустынножителю.

Кондак 9

Вся заповеди Христовы верно исполнил еси, преподобне отче, и толико Богу угодил еси, яко дарова великий дар рассуждения духовом и познания помыслов человеческих, учеником же

твоим глаголаа еси, яко множицею о глаголе, егоже провещал еси, каялся еси, а о молчании никогдаже, сим поучая их избегати празднословия душевреднаго, да возмогут благоприятно пети создателю своему: Аллилуия.

Икос 9

Витий многовещанных превосходил еси даром слова, преподобне, молчанием же твоим паче слова поучал еси вся приходившыя к тебе пользы ради душевныя, наставляя их хранить уста от многословия и осуждения ближних, еже и нас сподоби улучшить молитвами твоими, да зовем ти:

Радуйся, земный ангеле и небесный человеце:
радуйся, верный последователю Христов.

Радуйся, положивый хранение устом твоим:
радуйся, молчаливый подражателю совершенств Иисусовых.

Радуйся, молчанием твоим ближних твоих поучавый:

радуйся, высотой добродетелей твоих человеки удивлявый.

Радуйся, нищету духовную стяжавый:

радуйся, кроткое и незлобивое сердце
имевый.

Радуйся, всякое угождение плоти
возненавидевый:

радуйся пустынное озлобление сладце
претерпевый.

Радуйся, гнилую воду яко ароматы обонявый:
радуйся, вместо мягкого одра, рогозину себе
постилавый.

Радуйся, Арсение, великий пустынножителю.

Кондак 10

Спасения душевное стяжал еси вся дни
жизнотвоего, преподобне отче, и сие
благонадежно получил еси, в старости маститей
кончиною святою преставился еси ко Господу,
приятти от него мзду трудом твоим на небеси, на
земли же оставил еси память с похвалами
житием твоим благим, еже восхваляя, поем
Богу, дивному во святых своих: Аллилуия.

Икос 10

Стена ограждения явился еси верным, отче
Арсение, по честнем успении твоём, соблюдаяй
их молитвами твоими от всяких искушений и

озлоблений диавольских: приял бо еси благодать от Господа помогати земнородным, молитвенно ты призывающим:

Радуйся, победоносче, увенчанный от Христовой десницы:

радуйся, украшенный славою невечернею на небеси.

Радуйся, ублажаемый от рода в род на земли:

радуйся, радостный собеседниче ангелов.

Радуйся, блаженный сонаследниче всех святых:

радуйся, в лоне Авраамли упокоенный.

Радуйся, со избранными Божиими водворенный:

радуйся лицезрения Христова сподобленный.

Радуйся, приявый блага, праведным от века уготованныя:

радуйся, получивый гражданство Иерусалима горняго.

Радуйся, вселившийся, тамо, отнюдуже отбеже всяка болезнь:

радуйся, осиянный светом трисолнечного Божества.

Радуйся, Арсение, великий пустынножителю.

Кондак 11

Пение со ангельскими воинствы приносиши горе Пресвятей Троицы, Арсение богоблаженне, и молишия выну за люди, верно почитающыя святую память твою. Молим тя, преподобне: помолися и за нас грешных ко Господу, славящих днесь имя твое и ублажающих подвиги твоя: да будем и мы подражатели добродетелем твоим, и вкупе с тобою сподобимся пети Триединому Богу: Аллилуия.

Икос 11

Светоподательный светильник добродетелей евангельских был еси при жизни, отче Арсение, таковым являешия и по смерти, наставляя нас к богоугождению истинному душеспасительными изречениями твоими, в книгах святоотеческих записанными, от нихже почерпая назидание духовное, взываем ти:

Радуйся, зеркало чистое сокровеннаго в Бозе жития:

радуйся, свеще, горящая пламенем любви ко Господу.

Радуйся, совершенный о Христе подвижникче:

радуйся, добрый иноков наставниче.

Радуйся, Евангелия Христова последователю:
радуйся, апостольских преданий блюстителю.

Радуйся, богомудрия небесного
преисполненный:

радуйся, богомыслием молитвенным
удобренный.

Радуйся, уме, озаренный лучами
божественного света:

радуйся, связавый язык свой молчанием во
славу Божию.

Радуйся, в молчании твоём благоглаголивый
учитель бывый:

радуйся, ученики твоя богоугождению
истинному научивый

Радуйся, Арсение, великий пустынножителю.

Кондак 12

Благодать Господню испроси нам,
преподобне угодниче Христов, и буди нам
руководитель в царствие небесное. Молимтися
прилежно: помози нам немощным и грешным,
твоим добродетелем подражати, Богу, а не миру

благоугождати, да возможем благоприятно пети
всех Творцу: Аллилуия.

Икос 12

Поюще святое безмолвное житие твое, отче
Арсение, дивимся богомыслию твоему
молитвенному, яко выну с Богом пребывал еси
умом твоим, ныне же, егда прешел еси от
временных подвигов к вечному блаженству, тем
паче с Богом неразлучно пребываеши, и Бог в
тебе пребывает, егоже умоляти не престай за
чтущия тя и вопиющия:

Радуйся, крине святости и чистоты:

радуйся, древо благоплодное сада Иисусова.

Радуйся, возрасший в удолиях святого
смирения:

радуйся, вознесенный даже до горы
небесныя.

Радуйся, вышняго Сиона жителю:

радуйся славы тройческаго созерцателю.

Радуйся, всех святых присный друже:

радуйся, грешных с Богом примирителю.

Радуйся, подвижническаго безмолвнаго
жития верный указателю:

радуйся, о всех чтущих тя усердный ко
Господу предстателю.

Радуйся, души наша наставляяй во спасение:
радуйся, тела наша в подвизех укрепляяй.
Радуйся, Арсение, великий пустынножителю.

Кондак 13

О, великий угодниче Божий, преподобне отче
наш Арсение! Приими благоутробно сие малое
моление наше в похвалу тебе приносимое с
верою и любовью, и умоли возлюбленного тобою
и возлюбившаго тя Господа: да спасет и
помилует нас грешных, избавит муки вечныя, и
сподобит во царствии небеснем со святыми пети
ему: Аллилуия.

*Этот Кондак читается трижды, затем
читается Икос 1 и Кондак 1*

Молитва

О, священная главо, земный ангеле, небесный
человече, безмолвия рачителю, молчания
любителю, преподобне и богоносне отче наш
Арсение! Припадаем ти и молимся: помолися ко
Господу, Богу и Спасу нашему Иисусу Христу, да
дарует нам грешным и недостойным рабом

своим, вся ко спасению душевному благопотребныя дары своя: веру праву, надежду благу, любовь нелицемерну, благочестие непоколебимое, любомудрие христопоследовательное, и вся добродетели, во святем Евангелии Им заповеданныя: да будем подражатели твоего богоугодного жития, и вкупе с тобою сподобимся спасение вечное получить и царствие небесное унаследити. Ей, угодниче Божий! Не презри нас, но помози нам, небесным предстательством твоим, благочестно житие временное скончати, кончину благу, мирную и непостыдную стяжати, и блаженства райскаго удостоитися: да прославим человеколюбие и щедроты в Троице славимаго и покланяемаго Бога, Отца и Сына и Святаго Духа, и твое святое заступление, во веки веков. Аминь.

